

10 SEP 2001

MAHATHIR TIBA DI S'PURA BAGI ANUGERAH KECEMERLANGAN MILENIUM ASEAN

SINGAPURA, 10 Sept (Bernama) -- Perdana Menteri Malaysia Datuk Seri Dr Mahathir Mohamad tiba di sini hari ini untuk menerima Anugerah Kecemerlangan Milenium Asean pada malam ini.

Beliau diiringi isterinya Datin Seri Dr Siti Hasmah Mohd Ali.

Anugerah dari Forum Perniagaan Asean (ABF) itu adalah sebagai pengiktirafan terhadap usaha Dr Mahathir membawa perubahan kepada Malaysia sehingga menjadi sebagai sebuah negara contoh dan dinamik.

Menteri Kanan Singapura Lee Kuan Yew juga akan menerima anugerah serupa dari ABF bagi peranannya membawa perubahan kepada Singapura.

Kedua-dua pemimpin itu juga diberi penghormatan itu bagi sumbangan mereka terhadap Persatuan Negara-negara Asia Tenggara (Asean) yang telah menjadi teras di rantau ini lebih tiga dekad.

Bekas presiden Singapura Wee Kim Wee akan menyampaikan anugerah itu kepada kedua-dua pemimpin pada jamuan malam di Ritz Carlton yang dihadiri kira-kira 600 ahli perniagaan terkemuka dari kedua-dua negara termasuk 250 dari Malaysia.

Majlis itu dianjurkan oleh ABF dan Institut Kajian Strategik dan Kepimpinan Asia (Asli) yang berpejabat di Kuala Lumpur.

-- BERNAMA

TCL RHM